

欽定古今圖書集成

方輿彙編職方典



欽定古今圖書集成方輿彙編職方典

第四百十五卷目錄

衛輝府部藝文二

姚樞贊

明宋濂

許衡贊

前人

竇默贊

前人

石碣贊

方孝孺

三仁贊

李夢陽

比干墓銅盤辯

周思宸

古今圖書集成
題比干墓

吳達可

淇澳辯

張宜

衛康叔祠記

龍德孚

白鶴觀記略

路珠

百泉種樹記

翁大立

重修百泉書院記

崔銑

殷三仁祠記

前人

重修嘯臺記

李夢陽

遊輝縣記

前人

遊安樂窩記

王教

遊三湖記

李濂

重修比干廟記

蕭良有

職方典第四百十五卷

衛輝府部藝文二

姚樞贊

明宋濂

煜煜龍泉神彩內明視之如空其鋒所指無物不斷
捷疾如風媿之文獻雄姿英發靡有不同在前無古
在後無今有志卓卓倡道蘇門上沂泗沂下探關洛
施於有政蔚為王佐務盡忠諤立綱陳紀禮賢黜邪
風動四方大開文明輦致雅樂實自魯邦不殺之諫
晝夜諄諄舌不得藏治定功成渾然無迹莫窺所存

古今圖書集成
左許右竇三人同心扶乾植坤如帶如礪信誓弗渝
求世有聞

許衡贊

前人

濂洛之學傳自武夷重輝疊照日星昭垂逮我許公
尊聞行知若親摳衣寒泉之湄張皇幽眇釐析毫絲
如臯陶淑問畢其情辭如后羿注矢不失其馳既入
閩域遂升堂基橫經胄監衿佩鏘如祛其人私牖其
天彝釋其偏岐挽其九衢德成財達昭用于時黼黻
帝治甄陶泰熙明體適用公實庶幾無德弗報四海

祝尸嗚呼許公百世之師

竇默贊

前人

有倬竇公閭閻而馴雍雍而惇炳炳而文大衣垂紳
似不能言及摧權姦勢將排山綱常之陳皦若白日
照耀天下至今有赫大道旣明旁藝亦精九箴所及
以死爲生其學之醇其志之忠宜耄矣之嗟發自帝
衷

石碣贊

方孝孺

國之所恃在老成人以國爲家不私其親知以發謀

古今圖書集成
勇以戡亂雍容談笑力拯世難侃侃石子衛之父師
先事而諫徵若著龜始不吾從弒逆果作徐發一言
元兇就縛春秋所書篡弒孔多誰能討賊不煩干戈
雄才勁節英識大器抗牧晏嬰視之有愧世悅苟難
滅親是稱臨危善斷卓乎難能嗟衛之微臣有石子
嗚呼九州敢謂無士

三仁贊

李夢陽

殷喪厥馭奸宄師師天子不蓄神罔攸依國旣顛越
我寧獨支何其發嘅夫于二師三諫遂行允哉睿思

右微
子

於維哲人知微知彰譬如滔天涓涓是防象箸導奢
瓊宮兆亡鼓琴自悲過衢佯狂洪疇翊聖朝鮮錫昌

右箕
子

箕啓存祀干以殺身殷稱七竅孔贊三仁烈烈太師
實維國楨人之云亡邦是用傾鹿臺玉焚麥秀吞聲
右比
干

比干墓銅盤辯

周思宸

書曰武王克殷封比干之墓若銅盤銘則傳自汝刻

古今圖書集成
久矣元延祐間衛輝路學正王公悅曾臨墓石主推官張淑記之其釋文云左林右泉前岡後道萬世之靈于焉是保此墓傍之舊刻也按一統志云墓在衛城北十五里卽武王所封有石題曰殷太師比干之墓後魏孝文帝南巡親幸弔祭刻文墓上又云一在偃師唐開元中縣人耕地得銅盤篆文奇古云左林右泉後岡前道萬世之藏茲焉是寶則是墓有二而文不同然亦未嘗無辯也大抵衛爲殷墟本商王所都比干葬此地里不遠無論漢魏以來歷代追崇而

夫子亦嘗表而識之曰殷比干墓今石刻尚存則此墓爲無疑矣而况開元之前偃師未聞有比干之墓卽設若有墓則魏孝文之祭弔何於此而不於彼夫執銅盤以立疑似之墓豈若求古來之墓爲真耶卽中州通志亦云偃師之墓因銅盤以立信然哉今觀斯墓前有土岡右有泉源則延祐石刻之釋文地形得之特字畫與汝刻稍異而剝落失真斷碣已臥荒草間矣若藏茲二字據字形當從志釋此不必彊爲之說今並載之而重摹石上適修葺工畢而廟貌聿

古今圖書集成
新蓋興工役以妥忠靈而歲當大禋因以全活飢衆
莫非殷太師之餘澤也俯仰古今有感斯文書之以
識歲月云萬曆十五年歲在丁亥五月日識

題比干墓

吳達可

昔商政不君流毒宇內殷太師比干日擊宗社顛危
以諫被僂周武王首封其墓以勵世風千古而下令
人感慨有遺思焉余以督漕之命巡歷中原行次殷
墟之淇邑謁祠拜墓讀銅盤銘閱宣聖題輒興嘆曰
人知比干之諫死爲萬世節義之美談而不知比干

無意於求名也彼見商室之危日暮汲汲猶冀毒痛
之君萬一悔心之萌諫而行焉身存國存固所願也
諫而不行國亡身亡死亦非所避也卽明知其諫必
不行而去者有人奴者有人死諫不屬之吾而誰屬
也昔人箕子碑評謂紂惡未稔而自斃武庚念亂以
圖存先生隱忍而不去意蓋在此余於比干亦云有
宋文丞相庶幾近之宋室淪亡大事已去猶以其身
周旋王國十有二載殫心焦慮迨勢窮計竭而後不
憚以身殉之蓋聞比干之風而興者哉余旣弔其墓

古今圖書集成
又以告夫委質朝常者運際時艱知有君不知有身
不可無比干之諫知有國不知有名不可無比干之
心如漢唐末季名高而國隨以滅可永鑒已

淇澳辯

張宜

淇古名水也而邑名以之實在邑東二十里許爲南
北巨河土人因其出於太行遂名爲山河因其多石
不能通舟楫又名爲石河於戲僞者出而真者晦矣
好事者迷其真乃以北思德河爲淇水蓋以思德寓
終不可諠兮之意且其源出於衛武公之祠之下也

殊不知武公祠創於弘治初年亦司土者惟其思德
之意而成之實非古跡也觀石刻曰此蓋其游息處
也可見矣歷正德初劉侯繼祖公雅尚古治立碑於
思德河謂古淇水今名爲思德河人皆信其說之有
據後作志者不辨其始更註石河爲淇水矣辯論未
悉故碑不移土人惑於先入且見其言無徵也不肯
輕信余往歲不第春闈過而觀之亦信其然及承乏
是邑始疑之曰淇古名水恐此細流不足以當之及
得其志喟然嘆曰我固謂當有是仍質諸鄉紳及諸

古今圖書集成
父老猶以思德河對余不復信是以僭考索焉按詩云毖彼泉水亦流于淇夫泉百泉卽衛水也與其會於薛村口經不足徵與一統志云淇發源於林慮縣卽今之林縣尚有臨淇集傳不足徵與北浮山廟有古碑云西接太行東連淇水文不足徵與其衛相合之澣古今爲淇門鎮地理不足徵與據是四者然後以志爲是而以劉公爲承訛矣訛以承訛上下已千百年余叨是邑不忍以承其訛是故僭移思德河之碑於高村城之東河之西更題曰淇澳蓋不徒正干

百年之訛且欲就正於往來士君子之博古者焉

衛康叔祠記

龍德孚

衛何助乎周武王賢康叔而封之國也繼康而賢賢而著則稱武公云今衛關南隅有祠祀武公蓋自前守陳公慶建也今守姚江周公思宸至舉祀如故事乃詢康叔所爲祀曰康無專祀附主名宦祀焉公曰嗟嗟義以率祖禮先正名禮義者教化所由也以勞定國有功于民並載在祀紀而周郊配稷謂何哉儒者考信六籍則詩書所稱三誥與夫淇澳賓筵諸什

古今圖書集成
固在也以賢康不武後以定國武不康先抑之詩曰
罔敷求先王克共明刑夫明德慎罰康誥道之念先
王而紹明刑語湛于酒也得無懷于酒誥乎率乃祖
矣祀有常典分有定名君之不埒於臣也明甚奈何
祠孫而遺其祖也奈何祀君而列之臣也大不經矣
公乃相地於祠之左庀材鳩工構祠一區北爲祠三
楹南堂三楹左右爲號舍若干所請得祀康叔如武
公因葺武公祠之圯增益號舍拔七庠之俊士居業
而公督之時且新澤宮廣膳田力以富教爲己任甚

盛致也理官龍生德孚遙觀厥盛欣而艷焉爲之記
曰明有禮樂幽有鬼神神人之思實在岳牧而政教
所必先也以余觀兩君衛之賢也而明德均焉公修
祀典正名反始政先教化因俗宜民崇德象賢宅心
知訓此其機微矣而建侯胙土會逢其適沫邦淇澳
之思至深長已此又崇祀之意也乎生于斯牧于斯
知康叔之所爲化與周公崇古覺世之心而思共以
未之作新之澤尚有賴焉史稱文公實克中興孔子
嘗賢靈公於魯哀矣則以渠牟林國慶足史鱗故也

古今圖書集成
寸有所長也以兩公者附焉因並記之明萬曆十三年乙酉九月

白鶴觀記略

路珠

新鄉之有白鶴觀其來遠矣蓋因有白鶴兆祥故以名觀宋政和中秦人海蟾子過斯地畱仙跡飛篆於觀之壁好事者模之以素縑鐫之以翠琰金皇統三年縣令王庭宣創海蟾堂刻石爲記金元兵燹遺跡尚存歷於明朝至成化間沁水衝決頽敝殆盡弘治癸亥邑人王君佐等捐己地以恢拓之至嘉靖癸卯

沁河又泛門廡就圯道士趙潤與義官王讓等起址植頽越明年而告成請余記之余唯有觀則仙可依也有仙則觀可名也鐫石則傳可久也吾茲記之雖非白鶴復巢海蟾復過後之因事而探仙跡之微者或庶幾有考云爾

百泉種樹記

翁大立

嘉靖己酉初夏予校士至百泉環泉皆古木也少倦卽憩息焉予性喜種蒔而視土又宜木乃思爲郭橐駝事矣或言夏月恐非宜予曰天時不如地利此地

古今圖書集成
泉甘土肥無害也於是命侯吏移梧桐二十餘本竹數本植之於書院前檜柏椿楊榆棟桃杏榴棗諸木視隙地卽植之旬日而去踰年十一月予復來校士顧前所植竹木蔚然茂矣乃召諸生語之曰昔陽貨問樹人於孔子孔子曰樹桃李者夏得其蔭樹蒺藜者秋得其棘孟子曰舍其梧櫨養其楨棘則爲賤場師焉諸生予所樹也將爲桃李耶梧櫨耶予何樹木易樹人難也因書以示警云

重修百泉書院記

崔銑

百泉之有書院自副使吳公伯通始也百泉出蘇門之麓古之避地者多居之孫登以默邵子以易許氏以教姚氏竇氏以功吳公合而祀之吳公明朱學遂祀朱子而遡之至周子及其友南軒作齋與室以居諸生之來者後副使車公璽贈祀先聖羣賢降而配食今閱四紀書院殆廢正德庚辰知府翟君至以清嚴治衛事明作而民安乃大有慨於斯議修之御史見而謂之曰是弗可緩也已參政僉事奉約也惟謹副使來試士又言之御史風裁奕奕參政僉事協政

意在惜費字民獨於是役不吝也知府發帑贏財市材易甍檄知輝縣李傑肇事推官楊惠來責工知府又作樓三楹於思賢堂後樹表廣塗復地之隱於豪右者六十畝房六間以既稟諸生焉於乎斯役也可繹也夫昔弘治中士尚文畏義有司重學文章炳然可誦述矣正德初卽遭劉瑾之虐威劫賄成士氣索索已而薊盜中橫邊警川寇數年並發當是時仕者齷齪自守以待代不卽薙民獵金以幸遷官學漸毀公稟不續學官奉空腹而臥士或易衣而行野多退

士而悲憤幽楚之辭作故宗藩起變舊臣逸人不恥黨逆寧以廝養彬以武弁親侍帷幄以天下爲貨而市之且弋之何則人忘學而惟見利故也今大君作矣盡去其舊而新是圖舍士則亡所於藉也然而聖人之不生久矣莫之折衷故人肆其言夫古可學也而滯於迹今可通也而流於簡下學或拘於淺徑而上達者或蕩故詞繁而經晦徇名而實亡異端不與於是焉孟子曰萬物皆備於我矣含而潛之者仁也裁而宜之者義也仁且義又烏有四者之失乎御史

古今圖書集成
汪氏名淵參政陶氏名照副使王氏名韋僉事翟氏
名瓚曰鵬者知府也是役也吾聞諸金教諭廷貴云
明年改元曰嘉靖也

殷三仁祠記

前人

昔商季有仁人三戚以至戚而見疏且刻淇故殷墟
也故多有三仁迹然未有祠明正德末淇民李深有
志創爲以費不給止旣而山東劉金來令淇知深之
志乃請於都御史湖南何公而允閱月作屋三楹而
深內其田一夫以供祀事嘉靖改元秋何公按部至

淇進深而禮之舉於公而表門已修祭於祠弗說曰
古云報祠稱德三仁居斯弗可言稱將謂神其寧否
蕩民冒老釋且弘居師巫崇淫鬼以誑民皆屋之何
撤彼大此乃協彝典因詢謀其可率者僉以推官徐
謹對適祠外故有官田命垣之毀廟取材民競獻力
曰三仁者斯隅之產望諸萬世生其地者當興矣淇
民奮然曰深一夫爾而顧禮於巨公我其非夫與况
其力田敦行公其胡棄我孔子曰君子之德風小人

古今圖書集成
也草何公薄示表而興者祁祁何公直諫而權幸厄之不懼功丕著於省府不伐其治豫也嚴思緻式亡寃夫亡畫政是故有不動動斯應矣夫政豈聲色而已太史銑在鄴聞之其協事者參政鮑公而下之名氏俱列於碑陰

重修嘯臺記

李夢陽

跡者因乎彰者也思者追乎實者也求者存乎繼者也激者本乎風者也故觀人以彰可以識世思而求之政之繫也然不激不著著無定形視施以明顯默

拔微斯其政矣而御史許君按縣還也則謂予曰吾北遊於蘇門蓋登孫登臺云恍若見其人徘徊焉若聆厥嘯焉予曰思哉許君曰臺圯予令修焉已爲祠祠登於臺北予曰永哉自是有章乎然厥施繫焉又激揚之臣也風斯行矣夫孫登者晉之賤丈夫也無妻子屬云而棲其邑北山土穴內是蘇門之山也乃其人夏衣草衣冬而被髮自覆至微末不足述而史氏則稱之曰登好讀書撫一絃琴性無恚怒人或投之水中欲觀其怒登既出便大笑然登不欲言阮籍

常侯之既見與語登不應籍退而至山半聞有聲若鸞鳳音焉則其嘯也又嵇康從登遊三年問終不答康別去曰先生竟無言乎登乃曰火生而有光而不用其光人生而有才而不用其才故用光在乎得薪所以保其耀用才在乎識真所以全其年言如斯而已若登者誠何如人哉語曰桃李不言下自成蹊故人患在無實譽不必顯晦不必微實斯思思斯末矣故登者非赫赫聞者也非有河上公之授經龐鹿門之偶耕非如陶隱居巖處而朝議淵明嗜酒苦詩也

逃汚而潔我隨安卑而尊我追舍之而見者不謂其無峻絕而當時不以爲傲苦約而天下不以爲矯故過其里者思其臺登其臺若見其人徘徊焉若聆歎嘯焉祠之若靡之之永也斯非實之明效哉孔子曰邦無道其默足以容世之不幸莫大於使人默予故曰觀人以彰可以識世蓋言晉也亦謂登非徒默者也世不可使人默亦不可使人不默何也溺於顯則廉恥之道喪廉恥喪則政壞政壞則風不激故風者生於政者也政視其施思而未之必實焉彰此激揚

之先也許君得之矣夫嵇康者亦晉之聞者也乃卒不免於刑戮其詩曰昔慚柳下今愧孫登鳥獸之見畢弋莫不高翔疾走者知二者禍已也及冥於所欲鮮有能免焉者何也見欲而不見禍也故曰不習爲吏視已成事乃人自不必絕妻子污埋如登也能如河上公諸人自足免於世矣然而罕焉豈以激之者寡耶乃今人非惟不之激顧悻悻曰風奚益於世詎不大可詫也哉知縣趙鉞曰嘯臺傍故有思親聚遠二亭百泉南有穠翠亭咸圯監察公曰咸復焉然孫

祠之餘材咸無擾於官民又曰是役也按察僉事劉君實襄之云許名完丹徒縣人劉名澤濟寧州人正德十年夏五月日北郡李夢陽記記之日落成日也

遊輝縣記

前人

李夢陽曰詩云泌之洋洋可以樂飢予當正德戊辰值春仲之交而遊於輝縣於是覽蘇門之山降觀於衛源乃登盤山至侯趙之川遂覽於三湖返焉李子登蘇門之山扣石而歌歌曰泉水活活北之流矣有女懷春采彼薇矣山雪修阻暮予何之矣歌竟長嘯

古今圖書集成
響應林谷時人莫測也蘇門山古士率棲焉著者魏
阮籍晉孫登宋李之才邵雍元許衡姚樞耳然諸皆
有祠祀之獨籍不祠也蘇門有九峰山亦奇絕然其
上無泉侯趙川亦無泉可恨也太行山至蘇門也峯
萬餘數森森若排劍北走中有三峰獨奇而三寺各
當一奇有一泉繞之流乃其泉數里觸大石輒入地
故不至侯趙川李子曰予觀三湖險矣蓋虎豹之窟
而魑魅所宅也西踞壺關之巍北跨陵川之危東扼
林慮上黨而盤山路石研呀嶄嶄行若登天然過此

豁然曠川而四面皆山焉所謂侯趙川也蓋若桃源
焉三湖有巨竹蓊茂登山西望亭亭緣崖而綠者竹
也中湖則有石鏡半規耳而黝瑩能鑒天日山河人
物焉豈不異哉中湖寺趙宋號太平興國寺而屬湯
陰縣南北湖寺則今人創之者邊寺磽田以千數然
故櫟椽魄磊區耳於是寺僧招流人墾之租其入率
斬茅菅阻巖崦爲聚落烟火裊裊相雜也輝縣產魚
稻偕予行者二人一曰馮貴二曰左國玉左國玉予
內弟也內弟生不識山前出陽武行望見山喜以爲

雲已知其山也益又喜躍馬行懊不即至李子曰余遊蘇門蓋得於山川土俗之別云於是作遊蘇門記

遊安樂窩記

王教

方侯以余過其城甚歡慶且曰君子至於斯者未嘗不訪夫蘇門余曰諾侯乃率賓從具樽俎備禮設樂為百泉嘉會感今憶昔邈爾興懷非徒曰賞心樂事而已酒既行出遊山於是鄉貢士郭君瑞甫王君澄甫乃亦從余度泉源循山麓聯鑣履巉凌高眺遠幡然欲御長風出塵表遐想大觀未能即遂也相為依

沿雲厓迤邐北下約轉折纔里許以得邵子之安樂窩以入其室以瞻拜其遺像焉故雖疑其此新祠非故址然而窩之取名寓意實大則又三致稱歎云舊聞此窩之在當時亦惟繩樞甕牖環堵蕭然不如今之祠屋煥然足稱華居也堯夫則安之樂之可以覘其中蘊矣天下之安土者樂天厚望於世必多怨尤是故安則不求於樂而自樂未有樂焉不本於安者顏淵不改其樂孔子樂在其中皆隨寓而罔不安以故浮雲視富貴用則行舍則藏無一日非樂堯夫之

安樂名窩知非外徇精蘊在中蓋有取爾也九京孔厚往哲難作孔顏所樂遺書足証迎而遡求亦曰安仁而已矣樂天而已矣求之無遠安土卽是世人之忘其所樂滔滔皆是者不知安之爲安故也君子則何以爲安素位而行居易俟命焉爾能由是則聖域可企孔顏在我希邵者宜先於此義圖之

遊三湖記

李濂

人有言曰河北諸名山固多而惟輝縣山水爲勝輝縣山水固勝而惟三湖邃奧爲尤勝三湖信尤勝而

獨中湖奇絕爲最勝余慕三湖久矣今年春始克來遊聿償夙願云於是作遊三湖記藏諸山寺以附昔賢故事記曰輝縣之西北七十里曰侯趙川四面崇山巖嶭而中悉平疇烟林村墟雞犬相應蓋彷彿桃源焉相傳古時避兵者居此實四塞險阻之區也侯趙川有水北流土人呼爲北流河或者乃謂侯趙川無川誤矣然遊者欲至侯趙川必過十八盤山而十八盤山極危峻石磴仄隘盤旋而上殆若登天然遇不可輿處則徒步行僕夫牽曳以上俯瞰兩岸頗深

隋若較諸天壇之十八盤山則此差爲易上矣余晨
出百泉書院過午始抵侯趙川少憩巡檢司頃之至
中湖寺巖谷幽窈倚崖叢竹數萬竿翠陰蔽日涼颼
瑟瑟雖盛夏亭午暑氣不到余坐其下聞竹音如笙
簫竽籟心神瀟爽寺中有石鏡半規往聞能照山河
人物之影俗稱透靈碑余諦觀之殊昏闇與常石等
僧曰昔有一上官見此石異之昇以歸至盤山頂忽
昏闇無覩乃復送至寺云余聞僧言因憶歐陽公作
菱豁石記有曰好奇之士聞此石者可以一賞而足

何必取而去誠有識者之言南湖至中湖僅三里北
湖則倍之闊大宏敞視中湖寺咸弗及乃若各當一
峯之奇有泉有竹則三寺同耳中湖寺建於唐中和
二年南北湖寺則元至正間建有碑刻存焉余徧遊
三湖昏黑不能返宿中湖寺是夕風起撼林竹獵獵
如秋聲臥不成寐乃秉燭起坐賦五言古體四章曩
正德戊辰春北郡李公夢陽寓汴嘗往遊三湖歸爲
余言中湖之盛殿宇壯麗烟火稠密僧徒數百人歲
穀餘裕則乘騾馬距今三十餘年矣殿閣傾圯廟廡

毀廢僧死徙殆盡存者僅五六人朝不謀夕余怪問其故僧憮然曰比歲不登賦役日繁里甲逃之四方邑長吏繁僧完其逋坐是大困余聞而悲之乃私歎曰叢林廢興實物理之常無足深慨所可慨者徭重而上莫之卹民咸棄屋走至僧亦弗能寧厥居此中原安危所關有民社者不可不亟爲之所也詩曰不懈於位民之攸墜又曰瘼此下民不殄心憂嗚呼安得不懈于位之君子而爲之憂則民瘼其有瘳乎

重修比干廟記

蕭良有

余讀史至殷少師比干死事而惻然悲之也夫仁固有不必要以殺身成節固有不必要以殉生著者惟其心焉止耳必以殺身成仁殉生著節也若比干者可悲哉可悲哉李氏子之說曰微子去之利而不貞比干諫而死貞而不利而蘇明允亦曰儀秦者有其術無其心比干者有其心無其術甚哉其說之僭也此說行世乃有以私心議干者曰微箕不均貴戚乎可以去則去可以奴則奴計不出此而輕以片言觸禍無益人國祇貽其主以殺直臣之名過矣惡是何言也

是何言也此又與於偷生惜死爲人臣而懷二心之甚者也夫臣同也而疏戚殊爵同也而委任殊時同也而彼此先後殊可執一校邪殷德且衰獨夫正稔情關休戚身繫安危當是時所恃者獨三子耳微而去以慮宗社箕而奴以圖後功干不以此時極諫而安所慮且圖哉諫干職也亦干意也諫而死非干所知也及其怒出不測禍成剖心干以爲吾得死所然尤覬夫天未厭殷紂或悔禍幡然而悟悟而改蓋愆增美吾且含笑九泉一死庸傷乎卽不然昌言論列

慷慨就義庶幾哉有面目見六七君地下故夫比干之心所以異於人者非七竅之異異乎偷生異乎惜死異乎爲人臣而懷二心者也古之時有貞而不利者伯宗是已有其心無其術者鬻拳是已有貽其君殺直臣之名者洩冶是已比干若是班乎嗟嗟宇宙萬形斯須磨滅所恃以垂天壤貫日星愈久而彌章者獨此爲子死孝爲臣死忠一念耳比干以前仗節死義之士靡得而記比干而後彰彰較著者若屈左徒死楚伍相國死吳岳將軍文丞相死宋于肅愍楊

忠愍死於昭代雖其遇闇遭讒抗疏任事不必同其
心可以垂天壤貫日星一也而余周覽寓內諸君子
枌榆故里率有祠黜聖爽塏歲時瞻拜烈氣凜凜如
生表義槩於九泉示芳規於百世而十墓在衛輝郡
汲縣距縣署廿里而近其廟貌獨荒頽不可目蓋自
魏孝文肇之唐太宗新之我國家正統弘治嘉靖間
再葺之今且百年母乃世代遼遠未遑興廢守土之
臣庸得辭其責乎萬曆四年太守潞安暴君取前後
祠人文藝哀刻成編名曰精忠錄用意斯以勤矣後

十年而太守紹興周君睹廟址歎曰譬則世族然環
堵蕭蕭不蔽風雨則何以文獻爲而又會歲大祲道
殣相望君又慨然思曰興營役以採荒古之人非歟
於是請於當道亟下令伐材木儲甃石庀經費計備
直民謹趨惟恐後是歲饑而不害夫干也不能以其
言悟闇主而數千載之後猶能以其靈活瑣尾小民
於萬一不亦愉快哉君子謂周君此舉可以觀政矣
廟之中爲殿爲門爲廊爲齋堂者若干楹一撤而新
之內外周垣以丈計者七百悉易土以石費取諸歲

餘祭銀并捐助者經始於乙酉之春落成於丁亥之秋周君名思宸別號敬吾浙之餘姚世家舉隆慶辛未進士餘各因事有勞者具在碑陰不具書余既記之矣復系以辭辭曰

商家末造天降荒獨夫播惡將淪亡貴戚三仁邦之良弘濟時艱相慨慷微兮抱器歸徬徨箕也隱忍甘佯狂少師曰自獻先王讜言脫口身用傷明年牧野殺伐張剖心非痛痛亡商心則剖兮名則芳獨憐祠宇成荒涼卓哉周侯守是邦感慨欷歔爲構堂人孰

無死死綱常泰山鴻毛疇可量
呶呶三說疇爲倡井蛙夏蟲空望洋廟貌煌煌史勒章
周鼎商彝誰久長

此處為正文內容，因字跡模糊，難以辨認。

欽定古今圖書集成方輿彙編職方典

第四百十六卷目錄

衛輝府部藝文三

衛輝府拓城記

河防議

白鶴觀仙跡記

依水園記

衛輝府部藝文四

麥秀歌

明郭庭梧

前人

張縉彥

前人

詩

殷箕子

思歸引

周衛女

箕子

晉陶淵明

七賢鄉酒會

嵇康

自淇水薛村口涉舊黃河三首

唐駱賓王

使往天兵軍馬約與陳子昂新鄉為期及還而

不相遇

宋之問

東征至淇門答宋參軍之問

陳子昂

淇上即事田園

王維

太公

常建

嘯臺

賈島

入衛作

沈佺期

酬陸少府

高適

送魏八

前人

淇上送韋司倉往滑臺

前人

自淇涉河途中作

前人

其二

前人

其三

前人

其四

前人

敬酬杜華淇上見贈兼呈熊曜

岑參

題新鄉王釜廳壁

前人

弔比干墓

孟郊

送人過衛州

楊巨源

衛南

宋黃庭堅

登嘯臺

蘇軾

共城十吟

邵雍

安樂窩中四長吟

前人

安樂窩中詩一編

前人

安樂窩中一部書

前人

安樂窩中酒一樽

前人

重陽日再到共城百源故居

前人

安樂窩

前人

又

前人

又

前人

又

前人

箕子

王十朋

比干

前人

石碣

前人

蘇門

劉芳

百泉

權邦彥

七賢堂

金元好問

石門廟

前人

又

前人

湧金亭示同游諸君子

前人

梅溪

四首

元耶律楚材

霖落山

王惲

蒼峪山

前人

又

前人

蒼水

前人

香泉

前人

太公泉

前人

水簾洞

前人

蘇門山

許衡

卓水泉

前人

卓水泉

王惲

汲塚

前人

梅溪 二首

耶律楚材

竹林

王惲

湧金亭

前人

箕子廟

前人

周府君祠

前人

衛源廟

衛恆

前題

劉賡

香泉寺 二首

王惲

六度寺 二首

前人

白雲寺

前人

紫微觀 二首

許衡

比干墓

歐陽元

汲城懷古

王惲

百門泉 二首

王磐

衛源懷歸

陳祐

淇園

明劉基

衛河詠古

薛瑄

比干墓

彭時

淇縣謁武公祠

余子俊

宿蘇門 二首

李夢陽

汲縣謁比干廟

唐順之

嘯臺

前人

共城山水 二首

李濂

職方典第四百十六卷

衛輝府部藝文三

衛輝府拓城記

明郭庭梧

天子詔建封潞藩第衛郡卜基郡東隅其前當城陜隘於是衛遂奉檄詔拓城南面拓之工自萬曆十三年二月始十四年七月告成事其廣視舊袤加于舊若干丈門樓視舊壯麗亦加焉陶甄市灰以屬屬邑有力者而平其直夫役傭屬邑食力之民里胥籍上其名而無闌入者費金共若干得並給諸縣官建藩

第者分督者某官某官始終經畫者郡守周公也初拓城之詔下議者竊謂城以保民城幸完毀而拓之滋勞與費豈真廟堂第爲封建計遂不遑爲衛計耶此其說殊無當夫詩不稱城謝城齊乎彼猶建異姓侯耳且專爲城焉今幸天子篤懿親啓宇近畿地於是拓城也亦奚容喙者惟昔用召虎城謝山甫城齊此兩公者皆當世重臣也實能憫勞敷惠大役成而民不稱厲則周天子德意茂哉日者當廷議建藩於衛卽已有專使計必得良守與關決且拓城尤守職

也會衛守缺周公在郎署有聲籍甚乃出周公守衛蓋隱然待以召虎山甫也簡任軼於常守矣周公旣蒞衛城工起是年大旱明年又大旱或謂周公曰是役也時紕舉羸惟其偕於藩第不可止耳幸版築役竣括甃樓櫓諸役倘可待時乎周公曰吾方用是以哺菜色者將奚待臧氏早備修城郭不與省用並列哉於是卽又下浚隍令每夫日給穀可食三人出周公辦者較先役給金者溢焉當是時河北飢民匈匈且逃徙渡河竊掠者寢以衆周公乃褰帷循行境內

盡歷窮里召父老噢咻之曰若輩逃者豈有樂土為
儲粟耶將既至始為計也孰與就吾傭以需天雨彼
竊者苟活旦夕宜不恤抵罪顧惴惴夙夜不勞於傭
耶計所獲亦不必饒於吾傭直也於是飢民感泣相
率駢駢趨城役環城茨者爨烟相屬婦子嬉嬉如在
其里巷中夫衛當薦饑而民不流移盜不滋蔓伊誰
力耶則周公之悉心於拓城也非但不厲民矣先是
啓土得鼎一瓶一鑑二稱三瑞詳司理龍公記中比
城落成而甘雨降其為瑞符不尤彰彰哉往余拜簡

命赴都門過郡周公延余新城樓樓中可收一郡之
勝新霽遠近河山澄鮮如拭阡陌葱翠蔗饁絡繹與
昨覩黃埃赤日光景迥別矣周公灑然解頤屬余為
拓城記余固樂為述之蓋善周公以城工為流政尤
快夫上之德意得周公以明前議者將謂今日天子
篤懿親即以惠元元兩不悖矣周公名思宸起家辛
未進士浙之餘姚人

河防議

前人

嘗謂議河者貴相時以翊治審勢以宜民蓋時有古

今因而相之則不拂理以蔽治勢有輕重從而審之則不執已以病民故治無巨細及民爲惠惠無恆施遂民爲澤易曰神而化之使民宜之此之謂也維我明朝統一區宇成祖建都燕京漕會通之河輸東南之賦法甚良也向因二洪梗澀取濟黃流亦天啓其會者然慮者又謂丹沁同歸則潰溢不免於是有導沁入衛以殺河勢之議按記衛古御河發源蘇門山峰壑羅布每伏秋水泛滄民居禾歲苦久之議下之日河北之民益恟恟然若不適有居者乃以白之郡

伯王公公曰咨哉是予之責也古稱民之昏墊適然之數也是安忍於導之乎孟子曰禹以四海爲壑言水莫大於海以其能翕受也今慮黃河之溢而導沁流於衛河縱闊其東隘而廣狹淺深相去迥甚欲其能翕受而不橫溢也得乎善治水者當以水治水猶人之一身手病則療其手若以之而移於足謂非身之病可乎今病黃河之梗漕乃卽引沁而之衛焉恐未必能減於大河之流而洪濤泛衛沖齧不時且將並衛河之運而病之矣是手且未瘳又因而病其足

也尚何利哉矧瀕河之民歷懷衛而下逮大名德州直抵天津計關三省非眇小也夫寃精不化則甘澍不降人有抑情則天有墊氣是不可不深長思哉公遂毅然力白於當事者中間酌時勢具是非陳利害其詳已見之改河公移中茲不贅以故當事者可之遂寢其事民乃安樂業因徵記於庭梧梧曰體國恤民公之盛心也議成而遂寢之見當事諸公之心一而已矣以此及於民則爲大惠垂於後則爲永澤心相感口相誦者固昭昭也胡用記之咸曰此議由來者

久恐後之勦是說者復惑當事以禍斯民也是議也微郡公力主則吾民其魚矣是可以無記哉嗚呼公由名御史擢守斯郡其昔所建白皆彰著朝端海內炳炳可覩不獨此改河一事然也若他清操善政造福斯民又備見之當事者各薦剡中茲亦不著惟著其用以議河者云王公名天爵別號古庵徽之歙縣人

白鶴觀仙跡記

張縉彥

白鶴古觀不知始自何代相傳宋政和間僊人劉海

蟾經過飛篆堊壁之上今石刻炳然望之如龍翔鸞舞者是也先生丁晉季之亂往來燕秦間投簪辟穀葆真服氣元而上僊一時游歷多有異跡北方之人雖兒童女子無不知海蟾者然先生去今千禩矣事傳疑鮮所證據他無論矣卽如石旁董賓卿所記白鶴觀知事崔重微一日見道人謁於堂而一統志則稱汲令崔重微且金皇統去宋政和不過數十年耳縣令王廷宣石碣乃謂先生避秦坑焚之患隱其名而道號顯似先生名字不傳於世而爲始皇世人

矣塑像蓬鬢環耳怪陋異常絕不似貴人黃冠氣像下有一蟾仰沫吐珠又不知取何意無怪乎世人之訛稱也余低徊其下悚然久之夫僊字去今方數百年已爲手指模畫漸成細淺而石旁題記數字又磨滅不可全識再經千百年有與荒烟斷草俱歸汗漫之鄉耳可勝嘆哉余於是詳爲考稽如晉史列僊傳左編文獻通考三才圖會諸書得先生身貌士籍學道出處頗具乃爲鐫像記事以示問奇者易曰不事王侯高尚其事晉有陶隱士東籬笑傲不爲斗粟折

腰迹其桃源詩記飄然有凌雲之氣先生敝屣功名
掛冠遁跡寧獨慕紫雲青苔哉去燕適秦蓋其寄托
遠矣其志公則一淵明之流亞與若夫至人天隱其
次地隱其次人隱先生化氣成鶴齊萬物一死生天
隱人隱抑又未可量也榮祿者身之災也聲名者道
之賊也逃祿匿名混迹塵世先生固此成其隱耳然
則謂先生謁汲令可也謂先生為始皇時人可也謂
先生蓬鬢環耳怪陋異常可也謂先生名海取精蟾
蜍可也凡若此者皆天隱之極致先生之實錄若夫

神篆飛空偶然相涉此呂公偶傳丹篆千年術耳豈
足以窺先生哉

依水園記

前人

百泉勝絕羣水自孫臺邵窩遊屐紛沓而萬古深緣
遂為杖屐破削矣余久耽澄碧厭塵喧乃循源泉之
尾得之吾邑衛水之隩其流環郭而北數十里可漑
可汎可漁而又無昔人之結構以薄雲氣乃掃穢鋤
蕪為依水園園抵水小具一亭柳棚我以青陰草茵
我以輭烟開楹一望對翠嶽而延霞漪兀坐間烟波

反覆焉王覺斯先生見而樂之顏之曰水龕龕之趾
列行柏桃柳木槿芙蓉數百株東穿曲池引衛水入
之魚得蔭焉池之旁起怪石疊峰複巒漂浮水面坳
處有土洞深數尺曰雲浪洞上架小橋以通桃山桃
山者池上浮土積而成丘取北山亂石雜之蜿蜒龐
魄高深之致豁如也稍東有亭曰撫嵐左右林木籠
蔽亭獨疏遠老杜所謂開林見遠山恍惚見之亭之
外以瓦成垣野翠天碧玲瓏錯落北望花樹如秋月
窻紗不知傀儡之在眼際也水中有畫舫具茶鐺酒

鑪載漢書唐律數卷春雪初融臥聽撒網聲颯然
秋濤怒生噴薄拍岸驚飛衝沙鴈寒聚浦上汎橋口
下汎馱灣竟夕忘返所謂流連之戒余得毋犯耶岸
拓半里蓄棗柿桃李蔓菁另繕山房主之北望蘇門
如有几案南開簾以迎旭晴雲舒卷水鳥翻飛有先
生大人者車徒以憇名之曰集漪山居此室去水稍
遠亦曰集漪者風與水相際而成漪每當風聲吹葉
綠浪飄渺余魂夢依依不自知其在河渚之外也室
旁有小屋二南牖宜冬北牖宜夏室初成堊壁如洗

適覺斯先生自共城來夜宿忽狂起呼僕夫研墨走
筆寫大竹數十條風雨蕭蕭園丁驚走告余急往視
之先生大叫索酒漿自勞而趨觀者咸以謂有神來
焉西壁則郭山人世元寫松鶴配之修冷之氣與蒼
勁之風不復辨也園去城數舍民可至乃不爲遊人
所賞千年來處喧而能宜其德有足尚者士君子裹
烟霞爲骨裛風月爲致豈必絕塵脫迹哉終南之徑
以塞北山之檄尚在首陽非清柳下非濁若利害焚
其情得失移其慮卽寢處蘇門百泉之間公和堯夫

其笑我矣

衛輝府部藝文四

詩

麥秀歌

殷箕子

麥秀漸漸兮禾黍油油彼狡童兮不與我好兮
麥秀漸漸兮禾黍油油彼狡童兮不我好仇

思歸引

周衛女

周衛女之所作也昔衛侯有女趙王聞其賢聘之
未至而王薨太子欲留之女不聽拘於深宮欲歸
不得援琴而歌

涓涓泉水流于淇兮有懷于衛靡日不思執節不移

古今圖書集成
今行不隳矜軻何辜兮離厥菑嗟乎何辜兮離厥菑
涓涓泉水流于淇兮有懷于衛靡日不思執節不移
兮行不詭隨坎坷何辜兮離厥茨

箕子

晉陶淵明

去鄉之感猶有遲遲矧伊代謝觸物皆非哀哀箕子
云胡能夷狡童之歌悽矣其悲

七賢鄉酒會

嵇康

樂哉苑中遊周覺無窮已百卉吐芳華崇基邈高峙
林木紛交錯元池戲魴鯉輕丸斃翔禽織綸出鱸鮓

坐中發美讚異氣同音軌臨川獻清酌微歌發皓齒
素琴揮雅操清聲隨風起斯會豈不樂恨無東野子
酒中念幽人守故彌終始但當體七絃寄心在知己
自淇水薛村口涉舊黃河三首

唐駱賓王

朝從北岸來泊船河南滸試共野人言深覺農夫苦
去秋雖薄熟今夏猶未雨耕耘自劬勞租稅兼烏鹵
園蔬定寥落產業不足數尚有獻納心無因見明主
又

皤皤河濱叟相遇似有恥輟榜聊問之答言盡終始
一生雖貧賤九十年未死且喜對兒孫彌慚遠城市
結廬黃河曲垂釣長河裏溟漫望雲海蕭條聽風水
所思強飲食未願在鄉里萬事吾不知其心只如此

又

孟夏桑葉肥濛濛夾長津蠶農有時節田野無閑人
臨水狎漁翁望山懷隱淪誰能去京洛憔悴對風塵
使往天兵軍馬約與陳子昂新鄉爲期及還而
不相遇

宋之問

入衛期之子吁嗟不少留情人去何處淇水日悠悠
恆碣青雲斷衡漳白露秋知君心許國不是愛封侯
東征至淇門答宋參軍之問

陳子昂

南星中大火將子涉清淇西林改微月征旆空自持
清漳去已遠瑤花折遺誰若問遼陽戍悠悠天際旗
淇上卽事田園

王維

再居淇水上東野曠無山日隱桑柘外河明閭井間
牧童望村去獵犬隨人還靜者亦何事荆扉乘晝關
太公

常建

古今圖書集成
日出渭流白文王畋獵時釣翁在蘆葦川澤無熊羆
詔書起遺賢匹馬令致辭因稱江海人臣老筋力衰
遲遲詣天車快快悟靈龜兵馬更不獵君臣皆共怡
同車至咸陽心影無磷緇四牡玉墀下一言爲帝師
王侯擁朱門軒蓋曜長遠古來榮華人遭遇誰知之
落日懸桑榆光景有頓虧倏悲天地人雖貴將何爲

嘯臺

賈島

如聞長嘯春風裏荆棘叢邊訪舊蹤地接蘇門山近
遠荒臺突兀祇高風

入衛作

沈佺期

淇上風日好紛紛沿岸多綠芳幸未歇汎濫此明波
采蘩憶幽吹理棹想荆歌鬱然懷君子浩曠將如何

酬陸少府

高適

朝臨淇水岸還望衛人邑別意在山阿征途背原隰
蕭蕭前村口惟見轉蓬入水渚人去遲霜天鴈飛急
我行應不遠所與終未及欲濟江上舟相思空竚立

送魏八

前人

更沽淇上酒還泛驛前舟爲惜故人去復憐嘶馬愁

古今圖書集成
雲霞行處合風雨與中秋此路無知己明珠莫暗投
淇上送韋司倉往滑臺 前人

飲酒莫辭醉醉多適不愁孰知非遠別終念對窮秋
滑臺門外見淇水眼前流君去應回首風波滿渡頭
自淇涉河途中作 前人

野人頭盡白與我忽相訪手持青竹竿日暮淇水上
雖老美容色雖貧亦開放釣魚三十年中心無所向
其二 前人

南登滑臺上却望河淇間行樹夾流水孤城對遠山

念茲川路闊羨爾沙鷗閑長想別離處獨無音信還
其三 前人

東入黃河水茫茫汎紆直北望太行山峩峩半天色
山河相映帶深淺未可測自昔有賢才相逢不相識
其四 前人

茲川方悠邈雲沙無前後古堰對河壩長林出淇口
獨行非吾意東向日已久憂來誰得知且酌罇中酒
敬酬杜華淇上見贈兼呈熊曜 岑參

杜侯實才子盛名不可及祇曾効一官今已年四十

是君同時者已有尚書郎憐君獨未遇淹泊在他鄉
我從京師來到此喜相見共論窮達事不覺淚滿面
憶昨癸未歲吾兄自江東得君江湖詩骨氣凌謝公
熊生尉淇上開館常待客喜我二人來歡笑朝復夕
縣樓壓春岸戴勝鳴花枝吾徒在舟中縱酒兼彈碁
三月猶未還客愁滿春草賴蒙瑤華贈諷詠慰懷抱

題新鄉王釜廳壁

前人

憐君守一尉家計復清貧祿米嘗不足俸錢共與人
城頭蘇門樹陌上黎陽塵不是舊相識聲同心自親

弔比干墓

孟郊

殷辛帝天下厭為天下尊乾綱既一斷賢愚無二門
佞是福身本忠是喪已源餓虎不食子人無骨肉恩
日影不入地下埋冤死魂有骨不為土應作直木根
今來過此鄉下馬弔此墳靜念君臣間有道誰敢論

送人過衛州

楊巨源

憶昔征南府內遊君家東閣最淹留縱橫聯句長侵
夜次第看花直到秋論舊舉盃先下淚傷離流水更
登樓相思前路幾回首滿眼青山過衛州

衛南

宋黃庭堅

今年畚鍤棄春耕折葦枯荷繞壞城白鳥自多人自
少汙泥終濁水終清沙塲旗鼓千人集漁戶風烟一
笛橫唯有鳴鴉古祠柏對人猶是向時情

登嘯臺

蘇軾

高士隱蘇嶺平臺留至今峰巒相掩映松柏共陰森
自是甘潛迹誰言竟陸沉喜觀三絕易時鼓一絃琴
作炭人能識投河怒不侵常年居士窟素志樂山林
阮籍聞長嘯嵇康愧夙心谷巖悉響應鸞鳳同聲音

信是江沱咏誠非澤畔吟我來重遊覽清氣逼塵襟

共城十吟

有序

邵雍

予家有園數十畝皆桃杏梨李之類在衛之西郊
自始營十餘載矣未嘗熟觀花之開屬以男子之
常事也去年冬會病歸自京師至今年春始遇花
之繁茂復悼身之窮處故有春郊詩一集雖不合
於雅焉抑亦導乎情耳慶曆丁亥歲

居處雖近郭不欲登城市盡日客不來至夜門猶閉
院靜春正濃窻閒晝復寐誰知藜藿中自有詩書味

其二

病起復驚春攜筇看野新水邊逢釣者壠上見耕人
訪彼形容苦酬予家業貧自慚康濟力未得遂生民

其三

春風必有刀離腸被君斷春風既無刀芳草何人剪
腸斷不復接草剪益還生誰人有芳酒為我高歌傾

其四

桃李正芬敷花繁覆敝廬亂香尋密牖碎影下前除
靜遶晝眠後輕攀春醉餘縱然觀盡日誰敢罪狂疎

其五

郭外花亦繁不謂繁華失幸非在郭中不見繁華物
不寒不煖天半陰半晴日花外鞦韆鳴月隔鞦韆出

其六

風煖轉鳴禽天低薄薄陰烟容凝隴曲雨意弄河心
柳隔高城遠花藏舊縣深獨憐身臥病猶許後春尋

其七

九野散漫漫連昏鳥道間坐中迷遠樹門外失前山
襪襖耕夫喜幘幪居者閑騷人正凝黯天際意初還

其八

雨歇蕩餘春天光露太真茵鋪芳草軟錦濯爛花新
風觸鶯簧健烟舒柳帶勻如何當此景閑臥度昌辰

其九

花開風雨後忍病欲消磨未是疎狂極其如困頓何
梁間新燕亂天外去鴻多總是灰心事冥焉晝午過

其十

春暮多風雨離披滿後園曉餘殘片擁晴外亂紅翻
香徑難留衰嬌心絕弄繁成蹊是桃李狼籍尚無言

安樂窩中四長吟

前人

安樂窩中快活人閑來四物幸相親一編詩逸收花
月一部書嚴驚鬼神一炷香清冲宇泰一樽酒美湛
天真太平自慶何多也唯願君王壽萬春

安樂窩中詩一編

前人

安樂窩中詩一編自歌自詠自怡然陶鎔水石閑勳
業銓擇風花靜事權意去乍乘千里馬興來初上九
重天歡時更改兩三字醉後吟哦五七篇直恐心通
雲外月又疑身是洞中僊銀河洶湧翻晴浪玉樹查

古今圖書集成
牙生紫烟萬物有情皆可狀百骸無病不能蠲命題
濫被神相助得句謬爲人所傳肯讓貴家常奏樂寧
慙富室賸收錢若條此過知何限因甚臺官獨未言

安樂窩中一部書

前人

安樂窩中一部書號云皇極意何如春秋禮樂能遺
則父子君臣可廢乎浩浩羲軒開闢後巍巍堯舜協
和初炎炎湯武干戈外恂恂桓文弓劍餘日月星辰
高照耀皇王帝伯大鋪舒幾千百主出規制數億萬
年成楷模治久便憂強跋扈患深仍念惡驅除才堪

命世有時有智可濟時無世無既往盡歸閑指點未
來須俟別支吾不知造化誰爲主生得許多奇丈夫

安樂窩中酒一罇

前人

安樂窩中酒一罇非惟養氣又頤真頻頻到口微成
醉拍拍滿懷都是春何異君臣初際會又同天地乍
細縕醺酣情味難名狀醞釀功夫莫指陳斟有淺深
存燮理飲無多少寄經綸卷舒萬世興亡手出入千
重雲水身雨後靜觀山意思風前閑看月精神這般
事業權衡別振古英雄恐未聞

古今圖書集成
重陽日再到共城百源故居

前人

故國逢佳節登臨但可悲山川一夢外風月十年期
白髮飄新鬢黃花遶舊籬鄉人應笑我畫錦是男兒

安樂窩

前人

安樂窩中事事無惟存一卷伏羲書倦時就枕不必
睡忻後攜筇任所趨准備點茶收露水隄防合藥種
雞蘇苟非先聖開蒙吝幾作人間淺丈夫

又

安樂窩中弄舊編舊編將絕又重聯燈前竹下三千

日水畔花間二十年有主山河難占籍無爭風月在
收權閒吟閒咏人休問此箇工夫世不傳

又

安樂窩中春夢時閉門慵坐客來稀蕭蕭微雨竹間
霽嘒嘒翠禽花上飛好景盡將詩紀錄歡情須用酒
維持自餘身外無窮事皆可掉頭稱不知

又

安樂窩中春夢回略無塵事可裝懷輕風一霎座中
過清樂數聲天外來日影轉時從杖履花陰交處傍

古今圖書集成
樽罍人間未若吾鄉好又况我鄉多俊才

箕子

王十朋

諫君不聽念君深被髮佯狂自鼓琴千古其傳箕子
操一時難悟狡童心

比十

前人

諫君不聽合亡身豈忍求生却害仁不向天庭剖心
死安知心異世間人

石碣

前人

人情誰忍棄天倫公獨能將義滅親何惜一時誅賊

子不妨千古作純臣

蘇門

劉芳

太行東北來勢控西南垠偃然爲地脊萬里互中原
黃河界其間氣盛截其元盤桓萬古秀鬱爲唐晉藩
雄騁不能遏發越衛蘇門倚天碧參野不爲兵塵昏
右騫宰鸞鳳左遶奔鯨鯢鋪張幾地脈羅列百天孫
遂令愛山人獨知此山尊天巧茫未了泌泉出山根
珠璣無盡藏鼓舞玻璃盆悠然派素波遍遶梅花村
蓮陂與稻渚日夕香氣繁竹上看青峰竹下弄青瀆

笠屐山陰道城郭武陵源幽崖和長嘯逸興西山吞
碧巖招我歸擬倩雲爲軒願從無名公林下蒔蘭蓀

百泉

權邦彥

西山招人巧相逼興欲乘風先兩腋夜寒策馬古共
城未見春林眩紅碧土膏浮焰遠沄沄野燒舊痕明
爍爍造幽忽覺景物異心瑩如澄眼如拭山根出泉
泉湧竇泓此一樣玻璃色炯然毛髮立可數我欲探
之還杖植酈元水經陸羽品甲乙未許來輕敵徑須
乘夜掬月影且試飛橈撥雲跡塞垣奔馳厭長道貂

帽多塵更吹炙偶來娛此得閑曠塵土自無何用滌
境清意徹兩相會坐對行吟一傾臆鷗鷺飛浮亦閑
暇知我忘機羣可入擬將筆力出方象但覺才慳費
彫刻荒乘野逸不知倦是樂箇中真自適暮歸穿邑
驚市人應笑新遷二千石

七賢堂

金元好問

石壇高樹映寒藤閒有沙鷗靜有僧總愛山陽竹林
好七賢來了更誰曾

石門廟

前人

古今圖書集成
三仙祠下往來頻憔悴征衫滿路塵簫鼓未休寒食
酒樵蘇時見舊都人吹殘芳樹紅仍在展放平田綠
已勻西北並州隔千里幾時還我故鄉春

又

兩崖懸絕倚山垠草徑低迷劣可分潭影乍從明處
見竹香偏向靜中聞石林萬古不知暑茅屋四鄰惟
有雲曳杖行歌羨樵叟此生何計得隨君

湧金亭示同游諸君子

前人

太行元氣老不死上與左界分山河有如巨鰲昂頭

西入海突兀已過餘坡陀我從汾晉來山之面目腹
背皆經過濟源盤谷非不佳烟景獨覺蘇門多湧金
亭下百泉水海眼萬古留山阿盛沸灤水源淵淪晉
溪波雲雷涵鬼物窟宅深蛟鼉水妃簸弄明月璣地
藏發泄天不訶平湖油油碧於酒雲錦十里翻風荷
我來適與風雨會世界三日漫兜羅山行不得山北
望空長哦今朝一掃衆峰出千鬟萬髻高峩峨空青
斷石壁微茫散烟螺山陽十月未搖落翠蕤雲旂相
盪摩雲烟故爲出濃淡魚鳥似欲留婆娑石間仙人

古今圖書集成
跡石爛跡不磨仙人去不返六龍忽蹉跎江山如此
不一醉拊掌笑殺孫公和長安城頭烏尾訛并州少
年夜枕戈舉杯爲問謝安石蒼生今亦如卿何元子
樂矣君其歌

梅溪

四首

元耶律楚材

竹邊斜出兩三枝月底風前總恁宜小苑清香無處
著多因勾引玉泉詩
湛然垂老不愁貧得與梅溪作主人問訊冰華無恙
否香魂應也長精神

寄詩梅甫問平安彼此天涯耐歲寒筆力盡衰思意
退算來猶自勝居官

溪邊酌酒歡無盡花底橫琴興亦奇獨樂清歡人不
識箇中惟有湛然知

霖落山

王惲

東山削出翠芙蓉西壑硤研貯雪風人說魏王曾避
暑殿基猶是舊離宮

蒼峪山

二首

前人

山神說是宰公身野老年來話本因採玉得仙俱恍

忽至今功利及斯民
九龍分部中天雨何處癡蟠睡不開一勾鳳凰臺下
水有時風雨洗天來

蒼水

前人

萬山忽斷兩崖開中有蒼河自北來行出山門俱不
見玉龍翻作地中雷

香泉

前人

滴乳巖前掛瀑流青林飛洒動高秋玉龍躍入青冥
去堆壘蒼烟萬壑愁

太公泉

前人

縈紆一水蟠深澗野叟何知說太公壇下古碑堪晤
語大書深刻太康中

水簾洞

前人

秋雲不捲水晶寒芝草年深濕未乾翠壁懸冰鳴劍
珮朱絲穿露織琅玕夕陽倒影鮫綃薄春雨添流瀑
布寬我欲尋真問丹訣憑誰傳簡借青鸞

蘇門山

許衡

大山如蹲龍小山如踞虎烟嵐鬱蒼翠遠近互吞吐

我來蘇門居遨遊成樂土策杖望朝雲捲簾看暮雨
佳意豁塵腥勝槩入談塵使我鬱陶消使我勞瘵愈
平生鄙吝心一洗出千古回首聲利人何殊坐囹圄
遠役非素懷况有跋涉苦吟鞭裊東風遲遲如去魯
芳菲二三月追遊盛梅塢歸來願無違一觴期對舉

卓水泉

王磐

水有清聲竹有風我來端欲豁塵蒙明朝杖履西城
路悵望家山翠靄中

卓水泉

王惲

鏡中流水畫中山酒盡銀瓶興未闌碧玉沼深人不
見桃花飛度翠琅玕

汲塚

前人

瀾迤伍城都背水猶陣圖魏陵廢已久磅礴如覆盂
草樹慘不春穿穴狐狸墟我來登其巔懷古心躊躇
憶當戰國際安釐亦狂且澤糜被臯比坐為秦人驅
敗亡自此始保邦何乃疎不知身後藏安用書十車
上窺姒與商下建蒼周書零亂竹簡光詭說何紛拏
征南辯已詳多出行怪徒稽古不適正死為毛穎誣

古今圖書集成
其中亟當辯阿衡被夷誅孔子修六經亦已防姦汚
大書一德后薨葬聞亳都在易最奇法安取理所無
茲焉萬世程洋洋真聖謨何煩事幽蹟致遠泥所趨
長歌望陵去樂歌風乎雩

梅溪

耶律楚材

溪畔亭臺半劫灰冰香可惜爲誰開而今已有人爲
主折取疎枝寄我來

又

前人

素餐十稔我胡然潦倒而今欲避賢寄與梅溪且寧

耐求歸更待兩三年

竹林

王惲

漠漠筠林指舊棲幾年於此避危機奇才最惜嵇中
散空聽鸞音月下歸

湧金亭

前人

曉雲拂山山氣昏坐來萬壑橫朝暎丹崖翠壁畫莫
出但覺詩景供愁新地靈祠古秘幽怪天授神柄專
其尊年年簫鼓祠下路東風十里楊花春我來愛此
山水窟天氣著物清而溫湧金亭上一盤礴主人留

古今圖書集成
醉九金樽水邊滉漾多麗人往來但見珠翠裙不知
仙家足奇貨明珠脫串一一浮出摩尼真波間可玩
不可掇雲錦翻動玻璃盆書生潤身那羨此席上正
有我家珍舉杯酌酒但默禱山靈垂意哀王孫願分
秀色貯詩腹一洗萬斛胷中塵仙官有請固不拒山
鬼竊笑君無因不然結茅傍修竹雲烟占斷西湖曲
月明舒嘯碧山巔喚起公和跨黃鶴

箕子廟

前人

剗剔忠良詫肉林當年愁絕父師心道傳未信奴爲

辱俗古方知化獨深上念成湯思自獻下逢周武是
知音野烟無地尋遺廟空咏芄芄麥秀吟

周府君祠

前人

河山兩界殷故墟自昔土壤稱膏腴千年廢置灌莽
區殆似淵藪藏逃逋政以規畫無良圖堂堂周侯烈
丈夫一朝王門曳華裾利焉斯興害斯除南來主漕
過此都顧嗟行勢資豺豕血人干牙其忍歟龍亭入
奏爲允俞一語能沛天恩濡郊圻申畫開井廬連薨
表植左右閭日中市集百貨俱荒榛一旦爲亨衢流

古今圖書集成
民賴之彫瘵蘇勞來又復三年租夫耕婦織圃有蔬
桑無附枝麥兩涂芄芄翠浪西山隅昔焉糊口今羸
餘我食我衣公所與欲報之德父母且胡不均弘秉
事樞天奪之速世所吁公去雖遠愛豈殊身後報謝
當何如閼宮盤盤列綺疏繪肖公像儼以居歲時籩
豆民駿趨犧牲在几酒在壺坎坎擊鼓吹笙竽睟公
風馬乘雲車神兮歸來意恆愉風時雨若蛇蟲沮甌
窶滿篝厲鬼驅我詩刻石誠非諛采之民謠與同符
大書特書不一書太行礪兮河帶紆黃童白叟相攜

扶猶有墮淚沾龜趺

衛源廟

衛恆

上國風帆快轉輪石林香靄護神居龍吟別浦泉聲
細鳥拂空潭樹影虛

前題

劉賡

客來詎敢濯塵纓蘋藻區區效寸誠願乞一杯亭下
水散爲霖雨濟蒼生

香泉寺

王暉

龍巖悲臺倚寺西空山猶在舊禪扉老猿呌月蒼烟

古今圖書集成
外會伴山僧夜半歸

又

前人

絕磴穿雲老蘚荒
捫蘿行到贊公房
寶香冷徹華嚴壁
坐落猶誇夜月光

六度寺

前人

荒村到寺纔三里
古屋懸崖廢幾間
從此重經題品過
衛人方識有壇山

又

前人

支撐佛宇老風烟
歲月仍隨聖曆年
零落亂山終悵

望捫蘿應見入香泉

白雲寺

前人

爲愛西山欲徧經
春風吹馬上峻嶒
千章古木隈崖寺
一點晴光守障燈
石碣題名留故事
松陰遺榻對殘僧
婆娑最樂雙泉水
潤入高峰露氣凝

紫微觀

許衡

山水年來滿意看
只無幽竹伴幽閒
從君願乞龍孫去
栽向西城空隙間

又

前人

古今圖書集成
寒缸挑盡火重生竹有清聲月有明一夜客窗眠不
穩却聽山犬吠柴荆

比干墓

歐陽元

獨夫臺上醉紅裙七竅丹心豈忍聞白日已隨流水
沒青山猶護太師墳忠肝一片埋秋草正氣千年起
暮雲我亦停驂薦蘋藻太行落木正紛紛

汲城懷古

王惲

尚父祠荒草滿扉五城猶在陣圖圍飛梁水落橫霜
瀨石馬門空半夕暉竹簡有光陵寢破山川良是昔

人非臨風笑煞安釐事甘著虛名博禍幾

百門泉二首

王磐

濟南七十二名泉散出坡陁百里川未似共城祠下
水千窠併出畫欄前

又

前人

半空風雨山頭樹十頃玻瓈水底天孤客南來無著
處相宜只有百門泉

衛源懷歸

陳祐

功名場上日奔忙北去南來十五霜海嶽厚恩慙未

古今圖書集成
報薰鱸佳興偶難忘一身自覺妨賢路萬事宜收入
醉鄉塵土滿纓思一濯蘇門山下有滄浪

淇園

明劉基

駐馬淇園春正濃三山雲外聳芙蓉武公去後琅玕
少霽色猗猗入畫中

衛河詠古

薛瑄

衛河冰泮綠波勻南野春回翠麥新淇竹舊曾歌睿
聖柏舟猶自詠夫人太師遺表當官路西伯荒臺在
水濱靡靡遺音今已矣東風依舊鳥聲頻

比干墓

彭時

萬古乾坤八尺墳當年一死爲忠君謾勞異代加封
諡正恐英魂不忍聞

淇縣謁武公祠

余子俊

昔聞淇澳水今過武公鄉清遠靈沙靜幽深草樹荒
篔簹常夢竹蘋藻未登堂睿聖名千古高風耿不忘

宿蘇門二首

李夢陽

朝發陽武城暮宿蘇門里臥聽青山鐘遙在白雲裏

又

前人

北風吹山雲不見山上月蘇門一夜雨千峰盡成雪
汲縣謁比干廟

唐順之

下馬登丘壟藜林曲隧通碑因元魏樹地是有周封
酒散荒池上人行秀麥中故宮無可問徒此對松風

嘯臺

前人

晉時肥遁士長嘯此山陰自遠龍蛇跡能為鸞鳳音
清淨同河上沉冥異竹林坐超惟默理妙契守雌心
逸駕應難返荒臺尚可臨俯看恆衛水遙見太行岑
砌冷疎花發扉扃落葉深寧知千載後更有阮生尋

共城山水

李濂

共城西北蘇門山煙霞滿日春晝閒東風杖藜恣幽
賞暫依泉澗聆潺湲君不見孫登嘯臺幾千尺巉巖
上有仙人跡天空不聞鸞鳳音石壁孤雲為誰白

又

前人

百泉泉水天下無平地涌出千斛珠源泉在左信斯
詠清輝搖影涵蓬壺君不見古來名士邵與許卜居
傍泉此寧處考槃求志心所安落日懷賢重延佇

<p>...</p>	<p>...</p>	<p>...</p>	<p>...</p>	<p>...</p>	<p>...</p>	<p>...</p>	<p>...</p>
------------	------------	------------	------------	------------	------------	------------	------------



